



Allianz von Humanisten
Atheisten & Agnostiker

Chrëschttag: göttlech oder awer éischer mënschlech?

Carte blanche vum Laurent Schley op RTL-Radio

14.12.2016

D'Adventszeit ass am gaangen, a geschwë steet nees Chrëschttag un. Mee wat fir eng Konnotatioun huet datt Fest eigentlech haut an eiser moderner Welt? Doriwwer huet sech de Laurent Schley, President vun AHA Lëtzebuerg, puer Gedanke gemaach a senger Carte blanche „Chrëschttag: göttlech oder awer éischer mënschlech?“

De Mount Dezember ass eng Zäit, an där regelméisseg gewësse Leit drop hiweisen, dass jo d'Gebuert vum Jesuskëndchen d'Quell vun eiser Zivilisatioun géif duerstellen, an dass et genau aus deem Grond eng Zäit zur Besënnung misst sinn. Et gött sech och doriwwer beklot, dass an eiser Welt mat ëmmer méi reliounsfräie Mënschen, de Mënsch ëmmer méi an den Abseits géing geroden, an dofir misst grad op Chrëschttag erëm méi un ee "Gott" respektiv un ee Këndche geduecht ginn, dat op eng net-biologesch Aart a Weis soll entstane sinn. 't ass scho skurril: de Mënsch gerët anscheinend duerch Wëssenschaft, Opklärung an Demokratie an den Abseits, a fir dat ze konteren, solle mer eis reliéisem Glawen un Nët-Bewisenen an Nët-Beweisbares widmen. Hallo?

Déi Deeg ronderëm de 25. Dezember ass historesch gesi bei ville Vëlker d'Wantersonnewend gefeiert ginn, no där bekanntlech d'Nuechten nees méi kuerz ginn an d'Deeg méi laang. D'Kierch huet deen Dag einfach mat hierer Krëpphegeschicht besat, a mécht zanterhier, wéi wann se dee Feiertag erfionnt hätt.

Des Weidere misst een dach mengen, dass wann ee wëllt verhënneren, dass de Mënsch an den Abseits gerët, een sech soll op de Mënsch konzentréieren, an net op imaginär „Götter“? Sech op de Mënsch konzentréieren, genau dat maachen d'Humanisten. Si setzen sech a fir Opklärung, Toleranz a mënschlech Wäerter, déi, wéi am Fall vun de Mënscherechter, de Rechter vun der Fra a vum Kand, oder de Rechter vun Homosexuellen, oft géint den erbatterte Widerstand vun de Reliounen duerchgesat hu misse ginn.

Eppes soll dofir kloer gesot sinn: Keen huet de Monopol op eist Wanterfest, egal wat fir een Numm een deem gött! Jiddwer reliounsfräie Mënsch kann an där natierlech Chrëschttag op seng Aart a Weis feieren, oder et ebe si loossen. Zu Lëtzebuerg feiert wuel d'Majoritéit vun dee Leit "X-Mas" ouni di geréngste reliéis Konnotatioun an och dee sougenannte "Chrëschtbeemchen" huet säin Ursprung net am Chrëschtentum. Vill reliounsfräi Leit weltwäit, vu verschiddenen Nationalitéiten, Kulturen, a.s.w., gesi jiddwerfalls dee famouse Chrëschttag als eng Méiglechkeet, de Wanter ze feieren, dee mat senger kuerzen Deeg a



Allianz vun Humanisten
Atheisten & Agnostiker

laangen Nuechten, mat senger Keelt an eventuell enger schnéi-iwwerdecker Natur eng ganz besonnesch Atmosphär schaaft. Ee flott Fest wou ee beim oppene Feier mat senger Famill zesummekënnt, déi ee mat Kaddoe begléckt, eng Feier, déi ee genéisst mat guddem Iessen an Drénken, mat flotter selwer erausgesichter Musek, a mat allem wat ee soss nach wëllt dobäi hunn!

A bei all deem steet dann net ee Märchekëndchen oder een imaginäre „Gott“ am Mëttelpunkt, mee ebe grad dee real existéierende Mënsch.

Allianz vun Humanisten, Atheisten an Agnostiker Lëtzebuerg a.s.b.l. (AHA), www.aha.lu

Member *International Humanist and Ethical Union* (IHEU)

Member *European Humanist Federation* (EHF)

Member *Alliance for a Secular Europe*

Member *Cercle de Coopération des Associations laïques* (CCAL)